

- प्रधानमंत्री नरेन्द्र मोदी विकसित भारत जी राम जी बिल मांय मजूरां ने बेहतर हिफाजत देवण, खेती-बाड़ी री उपज मांय सुधार अर स्थानीय स्तर माथे योजना बणावण रा प्रावधान री सराहवणा कीनी।
- मुख्यमंत्री भजन लाल शर्मा विद्यार्थियां ने दक्ष नागरिक बणावण मांय अध्यापकां रा काम ने खास बतायो।
- प्रदेश मांय मौजूदा माली साल रा सरुआती 6 महीना मांय 15 करोड़ ऊं बत्ता सैलाणी आया।
- टी-20 क्रिकेट विश्वकप सारु भारत री टीम रो ऐलाण -सूर्यकुमार यादव कप्तान अर अक्षर पटेल उपकप्तान बणायी ज्या।
- राज्य मांय पोष महीना मांय ई घणखर ठौड़ां पारो सामान्य ऊं 3 ऊं 6 डिग्री सेल्सियस ताई ऊंचो।

000

प्रधानमंत्री नरेन्द्र मोदी केंद्रीय मंत्री शिवराज सिंह चौहान कानी ऊं विकसित भारत जी राम जी बिल रा बारा मांय लिखी ज्यो लेख सोशल मीडिया पोस्ट रे जरिये साझा कीनो है। इण मांय वे मांड्यो के ई बिल रो मकसद गांवाई हलका मांय काम-कमाई रा मौका अर तौर-तरीकां मांय बदलाव लावणो है। प्रधानमंत्री कह्यो के ओ बिल समाज कल्याण ने बधावो देवण अर खुद रे पाण ऊबो भारत बणावण री सोच रे मुजब बणायी ज्यो है।

000

मुख्यमंत्री भजनलाल शर्मा कह्यो है के नुवी राष्ट्रीय शिक्षा नीति विद्यार्थियां रा बौद्धिक अर नैतिक विकास सागे वां ने होशियार बणावेला। वे आज बांसवाड़ा मांय राजस्थान शिक्षक संघ (राष्ट्रीय) रा प्रदेश शैक्षिक सम्मेलन मांय बोल रह्या हा। वे भणाई-लिखाई ने समाज मांय बदलाव अर देश बणावण री बुनियाद बताता थकां अध्यापकां ने विकसित राजस्थान बणावण री जिम्मेदारी संपण री बात कही।

मुख्यमंत्री कह्यो के राज्य मांय लारला दो साल मांय 71 नुवा कॉलेज, 8 हजार स्मार्ट क्लासरूम अर किसानां रा बच्चां री कॉलेज फीस माफ करण सरीखा खास काम करी ज्या है। वे बतायो के 41 लाख ऊं बत्ता विद्यार्थियां रा बैंक खातां मांय स्कूल ड्रेस अर बस्ता सारु मदद री रकम सीधी भेजी ज्यी। श्री शर्मा कह्यो के मौजूदा सरकार हाल ताई 92 हजार नौजवानां ने नौकरियां दे दीनी है अर भर्ती रा काम मांय साफगोई तैय करी जा रही है।

000

मुख्यमंत्री भजनलाल शर्मा आज भीलवाड़ा जिला रा मांडलगढ़ मांय विकास रा 322 करोड़ रुपया ऊं बत्ता खर्च वाळा कामां रो उद्घाटन कीनो। ई मौके राख्यी ज्यी जनसभा मांय मुख्यमंत्री कह्यो के राज्य सरकार भणाई-लिखाई, ईलाज अर पीवण रा पाणी ऊं जुड्या कामां माथे खास ध्यान दे रही है।

वे साखां रा सरकारी मोल सागे डोढ सौ रुपया रो बोनस देवण रो ऐलाण ई कीनो। श्री शर्मा कह्यो के लारला दो साल मांय प्रदेश मांय भर्ती परीक्षावां रो कोई पेपर लीक नी व्ह्यो अर हाल ताई दो लाख 57 हजार पट्टा दे दिया ज्या है।

वे मांडलगढ़ री 'पीएम श्री' स्कूल मांय राख्यी ज्या जनसेवा शिविर रा फॉलोअप कैप रो दौरा ई कीनो।

000

राज्यपाल हरिभाऊ बागडे आज जयपुर मांय अखिल भारतीय पूर्व सैनिक सेवा परिषद रा 26 वां सालाना अधिवेशन रो उद्घाटन कीनो। ई मौके वे कह्यो के फौजी रिटायर व्ह्यां पाछे ई देश बणावण रा काम मांय भागीदारी निभाता रेहवे है। राज्यपाल देश रा प्रति फौजियां रा समर्पण री सराहवणा करता थकां समाज ऊं वां रा पिरवार वाळां रा भला सारू मिल र काम करण बाबत् कह्यो। वे पैली वाळा फौजियां रा भला सारू सरकार कानी ऊं चलायी जा रही न्यारी-न्यारी योजनावां रा प्रचार माथे ई ज़ोर दीनो।

000

मुख्य सचिव वी श्रीनिवास गौशालावां ने माली तौर ऊं खुद रे पाण ऊबी करण सागे आयुर्वेद ऊं जोड़बा सारू कह्यो है। मुख्य सचिव प्रदेश मांय गौवंश बचावण, गौशालावां ने बेहतर तरीका ऊं चलावण अर वां ने खुद रे पाण ऊबी करण रा बारा मांय जयपुर रा शासन सचिवालय मांय गौशाला चलावण वाळां अर पशुपालन अर गौपालन महकमा रा अहलकारां सागे मीटिंग मांय बोल रह्या हा। वे गौशालावां ने सब्सिडी देवण री प्रक्रिया आसान बणावण माथे ई ज़ोर दीनो।

000

प्रदेश मांय चालू साल मांय अगस्त महीना ताई 15 करोड़ ऊं बत्ता देशी अर करीब 12 लाख परदेशी सैलानी सैर-सपाटा सारू निकळ्या। ई सागे ई सैलानियां री आमद रा मामला मांय राजस्थान देश मांय पांचवीं ठौड़ माथे पूग ग्यो है। मुख्यमंत्री रा दफ्तर ऊं मिली जाणकारी रे मुजब राज्य मांय सैर-सपाटा रा हलका रा विकास सारू 5 हजार करोड़ रुप्या रो प्रावधान करी ज्यो है। राज्य सरकार महाराणा प्रताप अर ट्राइबल टूरिस्ट सर्किट सरीखी परियोजनावां माथे 100-100 करोड़ रुप्या खर्च कर रही है। ई सागे ई शेखावाटी री 662 हवेलियां ने बचावण अर धार्मिक ठौड़ां ने बेहतर बणावण सारू ई काम कर्या जा रह्या है।

000

वर्ल्ड हेल्थ एंड वेलनेस फेस्ट 2025' आज जयपुर मांय सरू व्ह्यो। जल संसाधन मंत्री सुरेश सिंह रावत इण रा उद्घाटन जळसा मांय योग अर मानसिक शांति रा महत्त्व माथे ज़ोर दीनो। वे नौजवानां ने डिजिटल विकारां ऊं न्यारा रह र संतुलित जिन्दगी जीवण री राय दीनी। श्री रावत कह्यो के बेहतर स्वास्थ्य सारू साफ पाणी जरूरी है, ज्यीं सारू सरकार ऊगणी राजस्थान री खास नहर परियोजना माथे तेजी ऊं काम कर रही है। कार्यक्रम रे दौरान मंत्री खुद सीपीआर देवण री सिखावण लीनी।

000

पैली वाळा प्रधानमंत्री अटल बिहारी वाजपेयी रा जन्म दिवस रा सिलसिला मांय प्रदेश रा गांवाई अर शहरी हलकां मांय 25 दिसम्बर ताई सुशासन सप्ताह रा तैत शिविर लगाया जा रह्या है। मुख्य सचिव वी श्रीनिवास आज जयपुर विकास प्राधिकरण मांय लगायी ज्या समस्या समाधान शिविर रो दौरा कीनो। पाली रा जिला कलेक्टर एल.एन. मंत्री बतायो के 'प्रशासन गांवों की ओर' अभियान रे मार्फत जनता री समस्यावां मौके ई निपटाई जा रही है।

-----

फलौदी मांय ई जिला कलेक्टर श्वेता चौहान कानासर ग्राम पंचायत मांय लगायी ज्या समस्या समाधान शिविर रो दौरा कीनो अर अहलकारां ने जरूरी हुकम दीना।

000

नागर विमानन मंत्रालय धुंअर अर कम दूरी ताई निजर आवण रा हालात ने ध्यान राखता थकां सगळी हवाई कंपनियां ने मुसाफिरां रा सुबीतां ऊं जुड़्या मानदंडां री करड़ाई ऊं पालना करण रा हुकम दीना है। मंत्रालय रे मुजब विमान कंपनियां ने उड़ानां री टेम सर

अर सटीक जाणकारी तैय करण, उड़ानां मांय लंबा बगत रा मोड़ा रे दौरान भोजन अर नाश्ता री व्यवस्था करावण अर उड़ान रद्द व्हेवण री सूरत मांय दुबारा बुकिंग या टिकिट री रकम पाछी देवण रा सुबीता मुहैया करावण बाबत कही ज्यो है।

000

केन्द्र सरकार माली साल 2026-27 रा फरवरी 2026 मांय पेश कर्या जावण वाला बजट सारु जनता ऊं राय मांगी है। सुझाव पुनर्लहवअण्पद पोर्टल माथे भेज्या जा सके है।

000

राज्य री मौजूदा सरकार रो दो साल रो कामकाज पूरो व्हेवण रा सिलसिला मांय चाल रह्या कार्यक्रमों रा तैत श्रीगंगानगर जिला रा छः विधानसभा हलकां मांय एलईडी वैन अर विकास रथां रे ज़रिए जनता ने केन्द्र अर राज्य सरकार कानी ऊं चलायी जा रही योजनावां री जाणकारी दीरीजी। बारां री कृषि उपज मंडी मांय सड़क सुरक्षा पखवाड़ा रा तैत जागरूकता कार्यक्रम राख्यी ज्यो। ई रा तैत एस.पी. अर जिला परिवहन अधिकारी ट्रैक्टर-ट्रॉली वालां ने यातायात नियमां री जाणकारी दीनी अर गाड़ियां माथे सेफ्टी रिफ्लेक्टर लगवाया। जालौर जिला रा 27 गांवां मांय विकास रथां रे मार्फत योजनावां रो प्रचार करी ज्यो। बाड़मेर जिला रा सेड़वा मांय राख्यी ज्यो फॉलोअप शिविर मांय चौहटन रा विधायक आदूराम मेघवाल जनता ऊं सरकारी योजनावां रो फायदो लेवण री अरज कीनी। श्रीगंगानगर जिला रा गांवां मांय ई विकास रथां रे ज़रिए सरकारी योजनावां री जाणकारी दीरीजी।

000

पौष महीना मांय अब संवारे अर सिंज्यां री पोर तेज ठण्ड महसूस व्हेवण लागी है। लारली रात डूंगरपुर मांय सब ऊं कम 5 दशमलव 4 डिग्री सेल्सियस न्यूनतम तापमान दर्ज करी ज्यो। अलवर मांय छह, करौली मांय 6 दशमलव 2 अर दौसा मांय 6 दशमलव 4 डिग्री सेल्सियस तापमान नापी ज्यो। हालांकि घणखर ठौड़ां दिन री बगत पारो 25 ऊं 30 डिग्री सेल्सियस बीचे रिकॉर्ड कर्यो जा रह्यो है।

भरतपुर अर डीग जिलां मांय संवारे री पोर ठण्ड और धुंअर रो असर महसूस कर्यो जा रह्यो है। म्हाणा भरतपुर खबरनवीस बतायो के लोग ठण्ड ऊं बचाव सारु अलाव तापण लाग्या है।

मौसम केंद्र जयपुर रे मुजब आवता दो दिन मांय पारो 3 डिग्री सेल्सियस ताई चढ़बा रा आसार है। 23 अर 24 दिसम्बर ने राज्य रा उत्तराद अर आतूणी हलका मांय घणी धुंअर रेहवण रा आसार है, हालांकि 24 दिसम्बर पाछे तापमान मांय 2 ऊं 3 डिग्री सेल्सियस ताई गिरावट रा आसार है।

000

भारत अर श्रीलंका मांय व्हेवण वाला टी-20 क्रिकेट विश्वकप अर न्यूजीलैंड रे खिलाफ व्हेवण वाली टी-20 मुकाबलां री सीरीज सारु भारत री टीम रो ऐलाण कर दियो ज्यो है। सूर्यकुमार यादव टीम रा कप्तान अर अक्षर पटेल उपकप्तान बनायी ज्यो है। रिकू सिंह अर ईशान किशन ने टीम मांय ओजू शामिल करी ज्यो है, जद के शुभमन गिल अर जितेश शर्मा ने टीम मांय जगह नी मिली है। न्यूजीलैंड रे खिलाफ टी-20 मुकाबलां री सीरीज 21 जनवरी 2026 ऊं जद के टी-20 विश्वकप 7 फरवरी ऊं व्हेला।

000